

四庫全書

集部

欽定四庫全書

集部
龜巢稿卷二

詳校官監察御史臣劉渭

中書臣劉源溥覆勘

總校官知縣臣楊懋珩

校對官主事臣陳文樞

謄錄監生臣張元愷

龜巢稿原序

人皆曰人相識則觀其形容聽其言論其善惡可識然其中未必能識也其未識者雖未嘗觀聽其形容言論苟於其行事著述焉察之其善惡之實可得而識矣不必觀其形容聽其言論也毘陵謝先生領江浙行丞相府檄赴三衢清獻書院山長阻兵居吳人爭先迎致於家為其弟子師先生訓說經史講論道義吳人爭禮之無間余居吳中與先生不同郡未嘗識其形容聽其

言論士子冬余來婁上徑山釋顏師年八十五矣間以先生所著諸書示余且致先生之言曰子宜為我叙鄉先生道鄉鄒公以危言立朝正學傳世論對宮闈得大臣格君心之體罷黜新學有聖門闢邪說之功伊洛之傳與龜山而南者惟公最著乃為收其遺文葺其祠墓是以有思賢錄五卷顧彥先湛浮亂世立功新朝優游鄉邦不忘家國審其理勢之變以為進退之宜可謂明智之士故亦為之請祠守墓是以有懷古錄三卷他如

考古論今校讐得失參之於經證之於史則又有所謂
辨惑編者若干卷至其吟詠性情見之於詩論叙事理
筆之於文典正雅麗足以黼黻乎皇猷敷陳辨駁足以
宣明乎至治則又有所謂龜巢稿者若干卷先生之論
著如此而行事因得以見可謂賢也矣嗚呼布衣而操
有位之權田野而懷經國之慮上友古人下敦薄俗蓋
其忠義之氣不以老而少衰朝廷求賢老成吾知先生
必為斯民一出矣余雖未及與先生相識而其精神心

術固已深知不必觀其形容聽其言論也叙其文如此
他日求識其面先生必不拒也先生名應芳子蘭其字
也吳郡張紳謹書

欽定四庫全書

集部五

龜巢稿全目

別集類四元

卷一

賦

卷二

詩

卷三

詩

卷四

詩

卷五

詩

卷六

記

卷七

啟

卷八

啟

劄子

狀

箋

表

卷九

序

卷十

疏

卷十一

書

卷十二

詞

卷十三

行狀

誌

銘

贊

箴

卷十四

題跋

傳

說

論

辨

文

雜著

卷十五

祭文

哀辭

卷十六

詩

卷十七

詩

臣等謹案龜巢稿十七卷元謝應芳撰應芳字子蘭武進人至正初舉三衢清獻書院山長阻兵居吳築室松江之旁洪武初歸隱橫山自號龜巢老人其集一卷為賦二卷至五卷為詩六卷至十一卷為雜文十二卷為詩

餘十三卷至十五卷又為禱文十六卷十七
卷又為詩編次頗為無緒疑後人傳寫亂其
舊第抑或本為前集十二卷後集五卷一則
先詩而後文一則先文而後詩傳寫誤併為
一集故參錯如是也其詩頗雅潔可觀文則
多應酬之作然其中如上周郎中論五事啟
上奉使宣撫書與王氏諸子書上周叅政正
風俗書上何太守書上武進樊大尹書與林

掌諭請建先賢祠書皆有關於國計民生人心風俗非徒以筆墨為物役者觀所作辨惑編力崇正理以糾術數方技之妖妄知為留心世道之士不但節並柴桑矣乾隆四十五年十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

龜巢稿卷一

元 謝應芳 撰

賦

弔豫讓賦

予讀史遷刺客傳閔豫讓亦廁於荆聶之列也故賦
以弔之

嗟忠臣與義士兮何正氣之烈烈匪死生而抑志兮豈
存亡以改節仰豫子之炳炳兮復故主之所仇感知已

以滅身兮雖九死其何尤欲潛名以匿姓兮乃絕蹤而滅跡爰漆身而吞炭兮雖家人而不識前詐刑以塗廁兮後伏橋而褰裳雖匕首之不利兮惟趙孟之不忘彼友不諒厥志兮哀其生之自苦曰汝才而臣之兮必近幸而釋汝計何逞而不行兮欲何求而不遂胡戕形以毀質兮乃前跋而後躓伊賢哲之確志兮固始終而不渝既指生以為誓兮肯中道而改塗身雖朽而無怨兮義不可以暫離聲雖喑而不顧兮行不可以少虧信所

為之孔艱兮忘所謀之不長將愧人臣之不忠兮遑恤
予身之見傷苟委質而求殺兮乃吾心之已貳仇不足
以報趙兮德不信于酬志念智氏之知己兮迺國士而
遇予忽反君以事仇兮殆犬豕之弗如嗟夫子之言行
兮與日月而爭光邈千載之遼遼兮紛郁郁其遺芳何
太史之不可攷信兮列彼名於刺客夫豈碌碌之燕荆
兮豈區區之軹聶士有沽譽而作善兮有徼利以行義
苟有為而為之兮雖似真而實偽彼知瑤之既殲兮及

知宗之既夷夫子之身無所託兮夫子之心為可知乃
抗節而效死兮豈攘名而蹈利彼太史之載筆兮胡不
章而反刺蓋自古孰不有死兮貴委命之得所諒夫子
非匹夫之勇兮宜君子之所與雖笑貌之不可得兮氣
凜凜其猶生撫遺史而歌弔兮表夫子之忠貞亂曰松
栢之剛有時折兮金石之堅有時裂兮維忠烈烈豫子
勇且決兮獲正而斃復何說兮不有君子疇發越兮千
古萬古祇刺客兮

復賦

陰陽消長之理無往不返蓋一闔而一闢者也夫幹流
推旋無端無始此天道之所以立也當其玉衡建子金
鐘調律而微陽之脈已驗葭灰于緹室也夫剝窮上而
反下則其象也具於碩果之不食而七日之始旋蓋其
幾動於日至之日也吾嘗觀雷在地中之象而得其說
夫雷陽也地陰也壯陰閉於九野而潛陽昭於窮泉斯
造化之至理生生而不息者也且萬物老死於坤而芽

萌於復蓋懼春生之不蕃故以養以藏之甚密也然必
自掩身而齋戒禁嗜欲於聲色於以待陰陽之初定存
萬感於一寂也況乎无疾无咎而利有所往實聖人幸
君子之道長於是乎陽扶而陰抑者也然則復其見天
地之心微至誠者亦孰得識也且天理之復固有其常
而人心之復亦不可逆故夫惡極必善而亂極必寧柔
極必剛晦極必明蓋以天生斯人靈於萬物者也若夫
迷而未遠乃能過返則若醉而得醒夢之得覺譬如夜

氣之清不受乎旦晝之梏也信能獲其萌於隱微之際
則朝乾夕惕以全君子修身之大節也凜乎其頻復之
厲裕乎其休復之吉也卓乎其獨復之勇厚乎其敦復
之實也赧乎其迷復之凶必自強而不自孽者也夫惟
顏子其殆庶哉因從事於克復而得善則服膺而弗失
者也蓋其明以察幾剛以致決故優優乎入聖人之域
也彼聖此愚均是人耳增予心之慙也君子則齊其心
而不敢放則善端綿綿而續也然則欲遏人欲而反天

理亦惟謹獨之念而幾微之不忽也

斥鷃賦

惟二氣之妙凝播庶類於羣生嗟斥鷃之至微亦稟氣而載形其薄質之輕儇無舉彩之煥明味不登於鼎俎羽不用於旗旌既無虞於罟網又何慮於弋矰於是庭除之際藩籬之下匪乘而遊翳匹而處決然而躍搶然而去物莫能害樂得其所匪榮留翳匪薄榛莽苟可托跡鼓翼斯舉匪陋麻菽匪羨稷黍苟可充食俯味斯取

夫其委命而足順理而安欲無所縱樂無所盤不因賄而致焚不藏珍以取患不飾身以賈禍不懷音而見殘靜若守而有待動若倦而知還雖形微而處僻任此生之自然彼其魯雞之鬪胡鷹之勢介距在身條鋌在體鸚鵡能言而入籠孔雀飾外而受制或產絕垠或生遐裔傷伉儷之相違哀母子之偕逝縱僥存而倖免亦貌慘而容悴豈非形色之壞材質之偉為世所用為人所貴諒處身之不智終有累於斯世且夫滄溟之鵬醢甕

金剛經
卷一
之雞均一天地復奚累為萬品一區要與之齊維茲之
鷄亦適其宜何重何輕何高何卑小大之辨又焉能知
達人大觀夫復奚疑

承露盤賦

粵昔漢武乘龍御天身都富貴心慕神仙動出塵之遐
想訪妙道之真傳覲長生而久視與松喬而相後先也
爾乃氣類翕從精神感召祕方畢呈至人胥造授房中之異術
論延年之至寶匪玉其芝匪瑤其艸采乾坤之精爽庶

可臻於壽考於是烹蜀道之美銅襍麗水之良金既噓
霆而煽電亦穴陽而治陰築栢梁之崇臺卓天表而嶽
峯諒彌高而彌峻非可計於丈尋觀其屹若雲峯壯如
砥柱表斷鼇以立極懸驤龍而行雨竊造化之功巧有
鬼神之呵護爾乃抗以仙掌冒以金盤詫飈輪之閃閃
驚園規之桓桓騁怪誕於羣姓馳雄偉於千官至人進
曰奇功既成吾事已濟願舉玉趾臨幸其地於是天子
乃漱正陽含朝霞屏萬幾之思慮絕九重之紛華迨夫

夜淡氣冲雲消月皓對靈湑於重霄降鮮英於清瀨泣
泣如飴霏霏如膏不賴乎金丹之鍊不屑乎玄霜之搗
蓋自然之嘉瑞真可以後天而不老遂乃屑蜚瑤和溥
珠靈液飲麤穢除神漿未擬醴泉焉如卻五味以謝六
塵又奚翅石髓之醍醐也既而形超埃壒體若羽翼超
火不焦沉淵不沒浩乎如禦寇之御風翔兮如蒙莊之
化蝶蓋夙昔之願以遂而求仙之能事畢矣嗟乎吾觀
漢武惑於方士既受誣於文成復見欺於五利信荒唐

之邪說殆無異於嬴政之世彼其內嗜聲色外窮甲兵
任貪夫而黷貨用酷吏而淫刑恣盤遊而無度極土木
之經營朝苦心而焦思夕疲神而憊精縱飛仙之有藥
復何可以長生觀其建元初政赫赫明明罷黜百氏表
章六經彌綸治道網羅羣英信一代之英主能持盈而
守成使其慎厥終始進乎明誠不玩於物不恣於情泊
乎其無為淡乎其太清則不必餐玉濯濯金莖處方壺
登蓬瀛自可以保真而養靜享無疆之遐齡是故至聖

金匱要略卷之二十一
無欲存順沒寧使漢武欲效唐虞之治胡不刻斯盤以
九字之湯銘

禦寒賦

有北鄰客訪於南鄰主人曰四序相推暑往寒來天時
既變人事亦催風霜高潔冰雪皚皚敢問諸子將何以
禦之哉主人對曰吾用吾計卿用卿策請子先陳吾為
子說客曰雄樓傑閣深閨邃房綺窓不啟畫閣初粧紅
爐獸炭煦若春陽此予所居之處也主人曰予也桑樞

竹牖且塞且瑾穴地作爐火惟煨燼客曰九醞之設八珍之列炙鵝鴈雁炮羔臠鼈聚物天美咄嗟而獲此吾所食之味也主人曰予也蹲鴟可煨桑落可傾一罌之雪復有茗烹客曰狐貉之裘綺紈之服襴以文繡飾以金碧舍舊服新隨意所適此吾衣服之費也主人曰予也帛以為襦卉以為袴且縫且紐復著以絮客曰重屏既列邃幙且張鎮帷以犀展罽在床錦衾繡縠爛其有光粉白黛綠笑言芬芳此吾寢息之安也主人曰予也

布衾如雪紙帳如雲縞綦茹慮聊樂吾貧客哂然而笑
曰予居養之異服御非常禦此隆冬猶未足當若子之
謂其亦疎矣主人曰噫是何言之謬也盈天地間林林
而生富今則濁寡今斯清分定之故孰敢云爭子亦為
我而不得我欲效子而不能胥樂其有何殊之稱且吾
居之而安不計乎室廬之華陋服之而煖不較乎裳衣
之麤細嗜之而飽不察乎飲食之精糲寢之而寧不論
乎衾裯之鮮敝凡可卒歲何庸侈麗矧予所謂天和者

而子固不足與於此子其行焉無汙吾耳客於是茫然
自失默然無語汗面芒背懷慙而去

閒居賦

夫何予性之耿介兮與時俗之寡諧築屋室於幽僻兮
離喧囂與氛埃繫前修之可慕兮矧古道之可追何皇
皇而無所止兮乃慮往而營來羌行止之有時兮信用
舍之有遇視富貴如浮雲兮豈名馳而利驚朝吾遊於
道園兮夕吾憩於藝圃思衡門之栖遲兮慕考槃之窮

處依灌木以結宇兮引清泉以為池樹脩竹之娟娟兮
滋幽蘭之猗猗與禽魚而相處兮同欣欣而忘機既撫
松以長嘯兮復臨流而詠詩列左圖而右史兮置前琴
與後棋春吾蠶以為衣兮秋吾穫以忘飢雖遯世而吾不
知兮唯昭質其無虧信鸞鵠不可以矰弋兮豈麒麟之
可羈宜雞鶩之爭食兮任駑馬之交馳延漁樵以論交兮
美田廬以自適既不怨而不尤兮又何喪而何得嗟萬
鍾之厚祿兮暨駟馬之軒車徒睽爭而交攬兮紛總總

兮焉如亦孰知信之可立兮孰知義之可服利其方以
為圓兮操其直以為曲彼恬然以為榮此赧然以為辱
諒薰蕕而不相入兮寧抱余之真獨蹇予豈獨好異兮
欲索居而離羣厭流俗之靡靡兮誠不能和光而同塵
景顏氏之屢空兮乃樂天而知命仰仲憲之蓬桑兮曰
惟貧而非病彼前哲之懋行兮羌與道而同符何愚人
之汨汨兮愴乎其若囚拘羞潘岳之諛佞拜車塵於途
側胡亦賦此閒居兮乃論士之巧拙雖千載之遼遼兮

金匱要略卷一
慨有感於予衷苟非拔俗而高蹈兮亦何予之能同系
曰時與我兮相違審夫命兮何疑憂人之憂兮羌者有
時樂我之樂兮知者其誰

肺石賦

郡學堂試

昔聖人之御世兮貴上下之情通羌一眎以同人兮曾
不廢於困窮有長以司平兮或權衡之失中繫窮民之
有愬兮阻天關之九重非設法以階其進兮嗟皇皇其
曷從爰置石於王都兮其色肺肝之與同使窮民立乎

其上兮得吐露其情衷心累累乎三日兮斯可見其哀
惘士師從而聽其決兮私一毫之靡容信尺蠖之久屈
兮覩大明之當空脫辛苦於顛崖兮躋春臺之融融乃
歸罪於其長兮激凜凜之清風以春生秋殺之道並行
兮誰膏澤之敢壅茲卷石之在他山兮亦惟玉之可攻
孰徵求於岩穴兮乃佐治而有功曰重厚而不可轉兮
疑自天之來降薄京口之狼石兮聚當世之梟雄圖沒
都之華石兮徒媚主於深宮咲佛爐之盤陀兮坐枯禪

以談空彼支機之神怪兮適欺世之盲聾是皆不足以
擬倫兮徒雕琢而磨礱惟嘉石之可配兮並見錄於周
公惟皇元之有道兮過成周之治隆倍麟趾之信厚兮
由上令而下共畫衣冠而不犯兮將比屋之可封無一
夫之不獲兮雖肺石其奚庸皞皞乎不知帝力之何有兮
民於變於時雍

四靈賦

江浙鄉試

聖王御極至治惟新修文偃武蹈德詠仁被聲教於四

表畢梯航而來臣發春陽之厚澤布大造之洪恩何隱
不顯何憂不欣何疾不瘳何屈不信士向道而游藝賈
棄偽而鬻真工務業於堅樸農務力於耕耘極中和之
至德致嘉祥之效珍維龜維龍維鳳維麟應時畢至以
彰聖神迺詠厥事耀於黎民夫麟之為物其形不類匪
麋匪鹿匪虎匪兕乃肉其角乃圓其趾不羣居而旅行
不陷穽而罹罟音既中於鐘律行復合於規矩生草不
踐微蟲不履原其德行吁嗟仁矣朝陽之鳳質稟天行

九苞表瑞六德儲祥晨遊紫霧夕飲元霜發文采之粲
粲動和鳴之鏘鏘臨寥廓而高峙凌雲霄而遠翔俾烟
霏之閔色與日月而騰光覽德輝而來下羌出處之有
常介族之長元龜寶先十朋之重五色之全下夷平而
法地上隆規而象天或萬年而升木或千祀而巢蓮順
陰陽以呼吸藏景曜於重泉斷休咎於滋感明吉凶於
未然信穹壤之奇物能鉤深而造玄懿矣神龍有威有
稜巨細脩短信屈降升千變萬化杳不可憑張鱗鬣之

參差挺頭角之崢嶸既行雲而施雨復噓風而吸霆或躍於淵或遊在垺擬物類以有體忽神化而無形聞之斯懾覩之斯驚蓋曠代而罕值實有國之嘉禎予嘗稽之傳記考之大經四物孔異有彰厥名若夫皇羲之世虞后之庭姒禹之代姬昌之京或以成太昊之紀官或以聽簫韶之九成或以負洛書之大範或以應闕睢之化行維隨時而隱見故王者以為休祥之徵矧茲昭代聖聖相承與勲華而比德眇漢唐之所稱海嶽之精藪

澤之英何祥不產何異不呈宜羽毛與鱗介總符合於
文明蹇予沐浴盛化歌詠隆平躬雖處於蓬室心獨向
於皇扃睹茲奇瑞欲默不能敬綴辭以成賦仍名之曰
四靈

酒賦

有客有客一醉一醒邂逅相遇款我柴荆醉則高其曠
達醒則矜其典型劇談雄辨舌搖風霆於是醒者睨醉
客而視之曰若不聞乎禹惡旨酒夏德其昌紂為糟邱

殷祚滅亡何物狂藥毒人肝腸甘之者必酗中之者必傷化慈祥為凶險變沉静為淫荒語言龐雜氣勢鳴張或罵將軍之座或登節度之床或吐丞相之茵或牽美人之裳或翹足沐猴之舞或俛首羣豕之場微酒之故胡然而狂甚而雙親之養不顧七尺之軀亦忘腐骨而斃遺臭無疆酒之害人如此若何不痛絕而謹為之防乎醉者曰是何言哉是何言哉吾聞上古窪尊三代壘爵苟聖賢之不飲何栝棬之有作書稱麴蘖禮曰清酌

鄉飲之儀獻酬交錯若近代之飲者皆磊磊而落落晉之八達非酒何以逃亂世之誅唐之八仙非酒何以脫微官之縛酒之於人其德不薄變怒為喜轉憂為樂釋憤氣之怨爭發鈍口之談謔故曰痛飲吾之師不飲客之惡獨醒之原懷沙寂寞啜茶之仝血染鋒鏑然則酒何負於人哉爾獨未知其趣而遽薄之也詞未既予乃從而釋之曰止止二子之說各倚一偏請折其衷子其聽旃往古來今酒不可無祭祀賓客日用之需但用之

者豐不可縱儉不可拘縱失之酒拘失之愚愚乃人所
鄙酒乃酒之辜酒以成禮威儀秩如酒以合懽怡怡愉
愉夫如是又安得喪於而德害於而軀亡於而國敗於
而家乎二客於是蹶然而起負牆而立請誦惟酒無量
不及亂之言庶無過與不及

龜巢稿卷一

欽定四庫全書卷

龜巢稿卷二

元 謝應芳 撰

詩

奉陪陳伯大先輩及趙師呂張伯起朱月江金
清夫兄弟登金牛臺

六龍城西呂城東奔牛古堰卧兩龍誰築高臺水中泚
野有蔓草牛無蹤河邊青苔生白骨刀鎗箭瘢猶未沒
聞知八十二年前戰死當時皆義卒鐵馬遁去劉將軍

大家牽羊走燕雲三百山河獻明主北馳南象今紛紛
登臨且喜得佳客鞠育青青已堪摘浮雲世事勿復論
一醉西風真上策

和蘇仲逸秋日懷鄉

夢繞松江太湖上舊家隣里古漁磯長腰秔米家家熟
巨口鱸魚箇箇肥為客已驚絲鬢滿還鄉何待錦衣歸
筆床茶竈蓬窻下來往風帆數日飛

呈趙徵士

吳姬手執金叵羅春風吹面生紅渦主人留客長夜飲
客拜主人辭酒多主人沉醉客亦醉客散扶歸主人睡
殘杯冷炙厨頭傾隣家兒有啼飢聲

江碧山千戶席上以我愛夏日長分韻得夏字
故書

堯階舞干羽聲教溢夷夏清風細柳營長日有餘暇兵
厨移竹林觴詠集陶謝酒傾虎頭盃盤割牛心炙佳哉
醉鄉境漸入如啖蔗客去復相期明朝還命駕

自冬而春舉家病疫予幸獨無恙既而疾止詩
以自賀并記里俗之陋云

昨歲夏秋旱四國人顛連餓死非不悲病疫尤可憐甚
者相枕藉遺骸飽烏鳶安知期月餘厲氣猶鬱然余家
百餘指連屋魚貫眠顧我如一木支此敗屋顛上堂問
湯藥下厨供粥飢鄉隣不我過恐為疫鬼纏俚俗無足
怪妖誣肆訛傳所賴學之力賦命知自天立言斥淫祀
秉志金石堅慈親今健飯甥男行滿前吾妻及女孀問

寢相後先嗟哉黃楊木脫此厄閏年東風播陽和草木
仍春妍

鄧道士遺梅花一枝詩一首酒二樽見惠時館
人王文父飲余遐觀樓次韻答詩仍要鄧晚集
欲作梅花賦才踈愧廣平一枝春到手酒香詩更清開
樽對雪飲將詩遣童去亟請過蕭齋石鼎與聯句

栽桑

春雨墻陰手自鉏
賸栽桑樹遶吾廬
歸來笑與山妻說

來歲春蠶食有餘

九日對雨

白雨何其急青山不可登兀然無客到閒似坐禪僧盆
菊數十藍村醪四五升猶勝陶靖節冷眼望王弘

養鶴

西隣主人翁養鶴如養客專童供鶴料稍慢童受責試
問鶴何如毛羽喜潔白又能舞蹁躑長鳴振金石客有
鶴骨清粹然含素德窮居以詩鳴冷面常菜色賦命鶴

不如可為長太息

送李知事赴邵武

詩闕

金壇李質字竹操延祐中以詩經及第前訓導常學
舟車千里遠甌粵萬山連舊俗民多獷孤城地極偏朝
廷用儒術幕府贊承宣更喜詩三百東南可盛傳

送凌萬里挈家歸海陵

隣居三十載奈此別離何客路秋光薄歸舟月色多雲
山連海岱吳楚隔江波珍重千金璞良工更琢磨

郡學西齋夜坐懷親友

客心清似水學舍冷如冰苔榻三秋雨芸編半夜燈病
多憂老母會少憶良朋麋鹿山林性悠然愧未能

送兄遊補陀山

蓮花已結東林社藜杖復尋南海遊千百億身黃面老
化城今豈在瀛洲

二

飛鳶跼跼水連天行李蕭蕭客上船津吏不須勞詰問

道人來禮白衣仙

三

烟霧昏冥晝不開
颶風吹浪雪成堆
獻珠龍女應相笑
何處扁舟載月來

四

堂上慈親老惜兒
遠遊尋佛咲兒痴
倚門望汝歸來日
三月闌珊四月時

寄錢唐教諭金君健

紫鳳銜書下九天
司徒今日復興賢
欲知別後成何事
和得陶詩百許篇

哭王伯祥

昨朝相別夢初萌
一夕那知隔死生
蹠自永年顏自夭
大鈞於物信無情

二

傷哉郎罷客西湖
匍匐歸來玉樹枯
風雨高堂春寂寞
忍聞長夜泣諸孤

惠山泉和翟玄玄先生韻

青山屈曲九龍盤一派清泉噴雪寒
陵谷變遷知幾度石池洋溢不曾乾
幽亭過客分雲液古寺閑僧煮月團
莫向貴游誇絕品恐煩迢遞入長安

耕隱為蕭徵士作

蘭陵溪上梅花村世居齊梁之子孫
瀕溪沃壤足禾黍教子讀書深閉門
時人笑渠生理拙渠亦笑人多覆轍
春來烏犍一犁雨歲晚黃精三尺雪
有時獨宿舞短蓑

飯牛別作耕田歌長安車馬自塵土奈爾濯足滄浪何
君不見蘇秦為無田負郭平生不識耕田樂奴顏婢膝
謁諸侯黃金載多禍隨作君今有田兼有書夜深燈火
朝犁鉏只恐一朝富貴逼人去猿鶴笑人留不住

送姪僧德無言歸靈隱

鴻鵠之志飛冲天鯤鯨入海方悠然汝生不受塵網牽
作佛要在靈運前先人辟經汝舍旃棄家另著牛車鞭
袈裟斜擔雲半肩東西南北十五年邇來參得靈隱禪

神鯉躍出西山巔歸來瓦甍携冷泉侑以白雲歌數篇
我昔西湖艤酒船曾聞老猿啼翠烟時秋雨洗山娟娟
石頭路滑難攀緣汝今言歸磨汝礪山中之人應汝憐
道經孤山脚下梅花邊敢煩為我問訊林逋仙

寄金陵陳雲心先生先生少學道游寓兩浙後
復歸儒而家于金陵以能詩善琴終見知臺閣然
屢薦不起學者多從之遊遠蒙惠書故以詩代

簡

先生閉戶自婆婆御史乘驄每見過白下詩名傳不朽
紫霞琴譜訂無訛樓居卧看三山遠學子來從兩浙多
一別十年還念我遠厓書尺問如何

送陳漢卿赴江陰州知事

玉雪風神秀雲霄志氣雄騫騰從早歲交結盡明公鶚
薦無虛日鵬搏適順風脩名今樹立令德愈磨礪清露
金莖表黃流玉璫中詞章追太史琬斲謝良工綸綍思
重被冠裳秩漸隆雄州勞替畫善政惠疲癯幕府文書

簡江城草木空風濤秋浩蕩烟雨晝冥濛退食塵塵吏
忘機對海翁仕優吟更好境會意何窮離索遙憐我殷
勤為擊蒙

慈親年八十

慈親年八十言笑滿懷春衣食兒躬稼黍嘗婦采蘋一
閑殊可喜長健不妨貧眉壽曾孫酒黃花節物新

二

慈親年八十早歲歷兵戈老此太平世宴然安樂窩門

前流水活隴上白雲多兒輩生涯好東臯雨一蓑

三

慈親年八十一子帶經鋤貧賤無鐘鼎辛勤有屋廬小
園千箇筍老圃四時蔬隣舍閑來往諸孫御板輿

四

慈親年八十頭髮雪紛然安得長生術終為不老仙平
生甘淡泊中歲絕腥羶淨拂燒香几持經繡佛前

聞友人陳子山廷試第一喜而有作用寄乃弟

子方

紫衣使者日邊來為道元方作大魁金闕早朝鳴佩入
瑤林日宴戴花回九天恩澤沾多士一點文星近上台
媿我無成驚且喜漁蓑獨速舞溪隈

犇牛巡檢石潤卿示予胡婦殺虎圖其事乃前
至元七年濱州軍士之戍棗陽與妻胡俱在道
上為虎所得胡逐虎殺之潤卿持畫索詩用題
其後

猛虎誰不畏良人吾所天眼看性命落虎口妾身雖死
何足憐嗟哉劉郎妻力不猛於虎怒氣一奮發執虎如
執鼠想當攘臂急逐時泰山可拔城可隳呼兒取刀兒
後隨刀入母手虎腹披當時若使遭虎啣虎口甘心作
同穴嗟哉劉郎妻今古誰足擬馮媛當熊為帝立饒娥
殺蛟隨父死嗚呼裙釵之下有君子宜爾芳名著青史

鮮于瑞卿還碧亭

鮮于公子平泉莊有亭翼然水中央天光雲影白日靜

菱葉荷花清露香
柳下繫船魚可釣
坐中留客酒盈觴
門前漁浦接洮湟
白鳥飛去烟蒼茫

朱逸齋先生挽詞

前朝士習雕蟲巧
先生詞章風格老
功名到手陵谷變
雲霖竟作商山皓
駢花儷葉墜秋風
獨抱遺經自探討
嗚呼一歌兮懷我
師平生瓣香今為
誰

二

堦庭桂子初芬芳
盲飈怪雨俄摧傷
中郎賴有女傳業

安然得老溫柔鄉平生綴緝富篇帙才名不與身俱亡
嗚呼再歌兮雲石裂斷腸猿叫黃山月

三

憶年十五從學經先生眷之雙眼青每隨杖履訪朋舊
耳聞目擊皆儀刑而今先輩總淪沒黃鐘大呂將誰聽
嗚呼三歌兮涕泪零魂招不來秋杳冥

送秦彥明

美人木蘭舟春風挂帆去輕舟疾如飛可喜亦可懼浙

江多風波越山暗烟樹孤月照蓬窗今夜宿何處

二

老驥千里村鹽車九折坂行行復行行伯樂遇何晚之
人懷帝閹丹霄路云遠一笑膏吾車疇能為推挽

送趙方叔入京

去去京華八月初聖皇清暑返鸞輿五門雨洗紅塵淨
九闕涼生碧柳疎慈母衣裳縫密綫丈夫門戶出高車
翰林若見陳脩撰為道野夫曾寄書

贈術士楊南溪

有客有客楊南溪天文之學師重黎又讀郭璞青囊書
書今不用如筌蹄十年湖海聲藉藉觀水觀山雙眼碧
一官雖冷氣如春那識人間有金壁相逢林下秋雨乾
高梧葉落天風寒杯酒殷勤盡清興作詩醉寫烏絲闌

立秋

苦熱念秋至立秋意欣欣一雨忽破由千山淨無塵新
月挂高樹涼風洒衣巾重來囊中書懷我堂上親丈夫

苟未遇妻孥耕且耘胡為苦離別低頭長傍人

和孫伯昭佛社

祭法垂明訓邦家祀有功愚氓何悖禮佞佛乃成風
婦女僧流雜香花佛社隆三身誇息怛千眼慕圓通
金像瞻如在珍羞共極豐九衢迎象駕百綵製天宮
窈窕閨房秀聯翩市井童莊嚴森侍衛游行適西東
行道駢緇素飛塵溢軟紅寶幢雲母扇銀燭竹晶籠
鐃鈸伶倫後袈裟粉黛中亂倫言可醜妄意福來崇
廢業兼旬久揮

金與土同盤遊律有禁長吏聽如聾闔郡喧邪說同袍
見直躬新詩來滿紙高論發羣蒙白雪無人和皇天鑒
厥衷不為因果惑真是丈夫雄感激徒三歎栖遲奈兩
窮抗言摧佛骨所願學韓公

贈丹陽歸真觀諸葛鍊師

鶴溪之水鳴瀾瀾九曲龍蟠護仙宅東南一望天宇寬
綠野平蕪接洮漈階前老樹三十圍門列脩篁數千戟
綠陰庭戶濕空翠五月天風吹巾烏野夫何緣飲丹井

遇逐尋真羽衣客焦仙莎衣煮白石呂翁榴皮題素壁
物換人非數百年予復幽探訪陳迹黃冠老師卧龍鍾
知雄守雌室虛白詵詵弟子皆速省中有詩豪更琴癖
陳雄坐能琴且長於七言哦詩鼓琴師亦喜一倡為之三歎息嗟予
汨沒塵土中到此悠然憂不釋采芝終日不盈簪曳屣
長歌晚山碧

寄題蔣仲益野趣亭

陶潛歸故園日涉乃成趣迷途雖不遠已恨出門悞眷

茲亭中人不識功名路幽居瞰洮滹詩盟結鷗鷺杭稼
湖上田花竹家後圃山色開畫圖波光照窗戶寒鐙課
兒孫春耕了農務杖屨三十年曾無一塵汚人生天地
間溘如草頭露軒冕渠自勞刀鋸吾無懼熙熙太平世
千載實難遇野趣祇自怡難以語童孺

代簡蔣成玉

往年同掣釣鰲鉤空載錢塘月滿舟從此相思不相見
槐花又老一番秋

二

東風傾蓋采芹亭一笑相看兩眼青
老我無成今學稼荷鉏依舊帶遺經

三

春來一月苦陰雨少頃雨晴邀客嬉
金斗城西芳草路水邊楊柳青離離

送牛季和赴旌德教諭

積雨喜新霽六合無纖埃江頭楊柳風
送客征帆開把

孟問青天網信恢恢之人飽經術吐辭粲瓊瑰不居
白玉堂合著黃金臺培風展雲翮胡為尚低徊往矣教
岩邑莞然育羣才戡戡敬亭山相看亦佳哉薺麥茂霜
雪蛟龍候風雷秋風木爪熟好題書後來

慈烏

倚窓看慈烏生雛念雛飢黃口未能啄雌雄交哺之羽
毛日以長飛飛展雙翼父母乃巢居羣雛為求食得食
能幾何入口不下咽去時聲啞啞歸來羽翩翩大烏能

爾慈小烏能爾孝他時子為子宜亦如爾報人為萬物
靈不孝誠何心我今作此詩警世還自箴

余子元御史枉駕敝廬以詩貽次韻奉贈

奇哉古秦鏡奸邪見肝胆當年獻天子重瞳目親覽爾
來匣中藏寒月光湛湛玉臺重拂拭清輝元不減

陪全公遊仁惠觀途中酌酒賦詩予和二首

吳山相送越山迎二十年前驄馬行今日經過舊遊處
詩情秋色喜雙清

二

山中羽人山下迎籃輿看山吟復行松陰呼酒聽琴語
一笑如見黃河清

邀高則誠郊居小集

別多無那苦相憶賴有尺書時往來逢人為說烏寶傳
此客合貯黃金臺北風塵土歲云暮南湖水波冰欲開
扁舟短棹出西郭元日相期看野梅

同遊趙君模過訪

荒城歲晚冰雪繁幽人校書深閉門書中樂與聖賢對
戶外寂無車馬喧年光冉冉老將至心事悠悠誰與論
肯為梅花過寒谷定邀高子共清樽

偕丹陽諸葛用中金壇王元徵同應鄉試阻風
無錫和用中韻

船窓晝暝鈎簾坐暘谷雷鳴送雨來佳友喜逢雙鳳集
清尊且對九龍開槐花滿眼催行色桂子吹香入酒杯
黃帽怕教牽纜去請看風浪雪成堆

次鄧混然韻送溧陽王元仁兼簡乃父時可先
生兄元德

客裡匆匆送客歸江空歲晚雪晴時父兄相見煩傳語
書劍重來好寄詩世事兩年多反覆人情一日九驅馳
甓橋東畔王猷宅杖履幽尋未有期

丹陽道中早行過呂城寫示諸葛用中十三韻
寒雞丑前鳴雨急風更惡吾欲遄吾車僕夫殊不樂坐
待風雨休早出丹陽郭行行二三里風雨復交作造化

小兒劇變態不可度雨濕衣欲冰風吹面如削前途迷
遠近古堠暗摸索懷哉故人居不遠可依託奈此道路
難尺進咫復却之人書萬卷芸香浸書閣閉門了無事
卧聽檐花落吾年幾倍之賦命乃爾薄詩成往呈似定
發一大喙

全僉憲自黃州遣騎以西洋布見惠作詩謝之
十月北風方怒號故人西布似綈袍遠勞使者傳書信
笑看家人落剪刀留得海圖飛鳳鳥絕勝山罽集鵞毛

歲寒冰雪空山裡千里相思報木桃

除夕和諸葛用中韻

盡道王門可曳裾青山吾自愛吾廬新年且醉屠蘇酒
舊業重脩種樹書堂上弄雛慈母喜階前繫馬故人疎
東風一樹梅花雪折得南枝報鯉魚

寄陳脩撰

五始師麟筆羣公繫馬遷欲明前代事不失後人傳紫
禁烟花繞丹霄日月懸書成天一笑高步更聯翩

諸葛用中邀賞牡丹痛飲終日且留僕與陳鍊

師宿成趣軒各賦詩十二韻

金谷春風暖名花宿雨霑錦

闕

覆幄華屋晝垂簾公

予開瓊宴仙人駕玉蟾妙年皆可畏老態不吾嫌柳雪
沾衣袂花枝壓帽檐舞裙雲冉冉歌板玉纖纖鸞鳳鳴
絲竹羔豚出釜鬻初筵猶秩秩終日竟厭厭客少情偏
洽杯深意轉快猖狂容阮籍繆語恕陶潛大笑南柯蟻
深慙上竹鮎題詩紀行樂罄折謝勞謙

次韻羅君仁閑居遣興

春近清明日花開金斗城
閑門忘寵辱染翰作真行
芳草自生意青山不世情
何留過幽壑携酒聽松聲

楊氏橘隱軒

少年走京洛衣冠泥塗脫
身車馬塵竟作山澤臞
開軒面流水坐對橘一株
客來必留連手談以為娛
手談亦何好聊適歲月徂
南風綠陰涼長日幽鳥呼
寂然此樹下身如蝸甲枯
千橘比戶侯斯亦非吾徒
況彼終南

山捷徑爭奔馳驅車過吾里豈不愧木奴

浙江平章庫庫公家養二鵠其雄斃於狸奴人
以他雄配之遂鬪死作義鵠詩

翩翩雙飛奴其羽白如雪鳥獸忽相殘雄死雌蹙蹙絕
食累數日悲鳴聲不歇蒼頭配他偶捍鬪項流血血流
氣猶憤血盡氣力絕嗟爾非鴛鴦失偶不再結嗟爾非
關鳩所性殊有別於人擬共姜之死同一轍夫何宮壺
內往往少貞烈夏姬更九夫河間不可說聊為義鵠行

永激婦女節

陳伯大先輩偕邾仲義陳容齋張子毅見過酒
邊以茶瓜留客遲分韻得茶字

白鶴溪清水見沙溪頭茅屋野人家柴門淨掃迎來客
薄酒遲留當啜茶林響西風桐隕葉雨晴南畝稻吹花
北窗幾箇青青竹題遍新詩日未斜

傷田家

踏踏溪上車疑疑田中苗踏車非不勤水盡苗枯焦人

力不勝天奈爾秋陽驕

二

初春脫寒衣典米事東作歲旱穀不收且無衣可著飢寒去何之前途半溝壑

又

堯田九年水湯田七年乾保民苟無術羣黎總凋殘我農今疇依州縣父母官父母不我憐何從語辛酸神農作耒耜后稷教稼穡安知後之人耕稼多乏食乏食未

足憂山中有黃獨奈何點鄉夫州城要脩築平明荷鋤
去雷鳴忍飢腹

菊泉詩為孫嘉賦

循彼南山言采其菊爰有寒泉在彼空谷挹彼注茲有
芬其馥既澄爾心亦瑩爾目所謂伊人溫其如玉宜爾
眉壽受天百祿錫之南陽為爾湯沐

嘉定雜詩

黍熟胡田花鳴飛雨香秋浦窮魚肥野翁織屨街頭賣

日暮裹鹽沽酒歸

二

赴潮艇子若游龍
潮落橫塘日下春
負郭人家星散住
水邊多種木芙蓉

崑山

時州伯移居太倉

孤峯雲疊疊舊邑
草蕭蕭覓石敲新火
拏舟趁早潮沙
田紅稻熟溪網白
魚跳寂寞悲秋客
蓬窓酒一瓢

寄邾仲義

我思垂虹橋春波綠楊津鄂棣華宅瞰此江之濱荷
衣佩秋蘭野飯羹紫萼一從橋上別花發三年春相思
復相思為爾歌停雲

二

我思釣雪灘烟波數千頃幽人讀書罷乘風放孤艇沙
頭弄明月水底見天影鱸魚秋自肥楓葉霜自冷釣鉤
未連鰲聊此駐清景

過太倉

楊柳溪邊繫客槎
桃花雨後柳吹花
東南地角環滄海
日夜潮聲走白沙
市舶物多橫道路
江瑤價重壓魚蝦
天妃廟下沈玄壁
漕運開洋鼓亂槳

簡崔徵君

姚參政門人

牧菴夫子久絕筆
巾笥藏書手澤存
白首逝將深報國
青雲多是舊同門
去年雪裡西郊別
何日花前北海尊
芳草萋萋春又晚
杜鵑聲裡憶王孫

和王文振遣興

齋居幽事頗關心晉帖時時手自臨徐孺不來常挂榻
鍾期相遇始彈琴東風城市紅塵暗長日軒窓碧草深
聖代明堂方有作豈容材棟老雲林

送陳縣尹之東流

東流父老候飛鳧莫遣前驅叱避途好問去年天子詔
邑中差稅受恩無

哭全僉事

早歲乘驄馬當時負重名四川豺虎縛一疏鬼神驚解

組歸江漢還家訪友生
安知成永訣杯酒呂蒙城

羣鼠

羣鼠穿我墉畫出不我避
蒼頭往執之赤手反遭噬
號呼驚四隣狸奴盡呼至
羣狸視如盲鼠輩從此逝
老我氣力衰長吁夜不寐

寄惠山鑒長老字仲明號太虛

太湖之陽九龍峯金田蟄
爾僧中龍山頭雲出野漠漠
石眼泉落聲淙淙呵冰古硯
寫墨竹掃雪臨軒看碧松

金史卷一百一十五
卷二
別來兩度歲華晚祇見梅花信一封

答友人問訊

官河春水綠粼粼重結衡茅近水濱
膝下斑衣三稚子堂前白髮一慈親
閑門無事足為樂插架有書何患貧
秫田更喜逢年熟釀得香醪味頗醇

元日試筆

萱草堂前竹數竿歸來喜見總平安
春風暖入屠蘇酒朝日光生苜蓿盤
萬國臣隣同受朔一年時序又更端

買臣未衣還鄉錦庸豎從教白眼看

送新安程以文先生入京

春雪初消楊柳黃揚雄奏賦入明光鶯啼禁苑烟花暖
人着宮袍雨露香聖代百年周禮樂儒林諸老漢文章
政須直作揮椽筆風月平分白玉堂

和京口張君益南園新居

鐵城如甕藏華屋金樹垂絲鎮畫橋賀厦燕來尋舊主
灌園人立候春潮戲題花月詩皆好醉覽江山酒易消

天意也應留遠客雨師連日瀉天瓢

王元德別去數年重會呂城諸葛氏家寫蘭見
贈且索詩送行時予辨惑編成或忌而謗之者
因併及之

與君一別幾十霜喜君學與才俱長向來作詩方刻苦
而今格律殊高古向來祇為竹傳神而今更為蘭寫真
懸崖疊石足幽致古木寒藤有生意胸中清氣吐筆端
有聲無聲俱可觀相逢莫恨無知者縑素盈箱乞傳寫

絕勝編書斥異端老我穿屋牛衣寒十年歲月磨研鐵
羸得羣僇爭吠雪願君為作指南車獨行周道當何如

荅凌萬里見寄

移家一別十年多予髮蒼蒼子若何老去情懷偏念舊
向來消息頗傳訛遙憐杜甫因詩瘦欲為揚雄載酒過
稍待長江羣盜息洞簫吹我醉時歌

送辛明善之縉雲監稅兼簡高則誠錄事

縉雲山水盤盤一舸夷猶七十灘如此壯遊良不惡

何妨遠別去之官風生白苧征衫薄雨過黃梅客路乾
傳語郡中高錄事小篇求序冠篇端

題桃源圖

昔年曾讀桃源記會得陶潛言外意柴桑避世如避秦
恨不山深絕其事借人為喻說桃源漁郎之遊皆寓言
不然溪上山如故何乃舟迴徑迷路若令此景真在山
此翁必入窮躋攀編書不用書甲子姓名無復留人間
只今唐虞太平世花柳村村足佳致不須重展畫圖看

四海桃源復何異

張子毅生日招飲以詩壽之

深山大澤生龍蛇文采風流出故家
柔柔負郭田三頃燈火乃翁書五車
南風初結石榴子細雨微浥菖蒲花
生徒女樂為君壽老夫也得醉流霞

避雨

繫馬度亭東郵亭似鶴籠
長河飛白雪高樹洒清風
州境纔相接鄉音便不同
野人來問字錯認是揚雄

無錫贈何敬存

歲歲九龍峯寒泉落冰雪美人此傾盖為我滌煩熱世
途自荆榛肝胆無楚越凭高一長嘯清風滿林樾

送崔仲德歸錢塘

家住湧金門瀕湖五畝園梅邊童養鶴松下客呼猿頭
白心猶壯官卑德自尊徵車未來日詩禮教諸孫

送盛本初教諭之全椒

淮海維揚才俊多先鞭奈爾妙年何瓊花春酒三年別

淅水秋風一葦過聖代只今興禮樂人家是處有絃歌

安書寄與南來鴈時有新詩到薜蘿

時乃翁克明先生為毘陵教授故云

卒至善永思亭

而家本西域而翁葬桐鄉鄉人猶永思哀哀況諸郎春
雨暗宿草秋風悲白楊別來春復秋於焉奉烝嘗思成
見容色宛在羹與牆一念不少休東流水湯湯到海水
猶已此心未渠央貽謀子若孫百世豈有疆

次韻陳知遠秋日言懷

奔牛古堰頭築室俯滄洲愛客常沽酒耽書不下樓青
山啣落日白露濕高秋最喜多兄弟雙親百不憂

諸葛用中成趣軒

幽幽小園池結屋三四楹若人青雲器乃有邱壑情涉
園以成趣尚友陶淵明池水魚潑潑花枝鳥嚶嚶太極
圖外意芳草堦前生吾趣吾自知對客無以名欲識琴
中趣且聆絃上聲欲識酒中趣百壺與君傾啖蔗勿遽
棄佳境將來迎

李御史過訪

霜飛白簡照南臺
早歲君門射策來
獨立敢言天下事
實封頻到御前開
駢駢驄馬過茅宇
戀戀綈袍念樗材
慚愧山林麋鹿性
偃然方樂卧蒼苔

題畫鷹

蒼鷹獨立清秋樹
劍翮風生欲飛去
林間燕雀動成羣
海上鴛鴦亦無數
駕鶴燕雀鳴聲喧
擊之不擊無足言
快須為我殺鴟鵂
勿使空人之曠城

曹娥廟

死孝魚龍窟垂名簡冊香江流隨姓氏鄉土奉烝嘗黃
絹碑詞古青山宰木長世間梟獍子何面過祠堂

伏日奉懷浙江高掾吏次早友人黃仲德入杭
以詩代簡

伏日常年苦炎熱今年伏日風雨涼官曹早出丞相府
賓客高會湖山堂垂楊繫馬綠陰靜畫舸採蓮紅粉香
應有新詩紀行樂武林風物增輝光

河鮑

世言河鮑魚大美有大毒彼美吾不知彼毒間已熟其
子小如芥食之脹如菽腹腴膏血多目脾頭項縮烹燒
苟失飪禍至不轉瞬或言直一死輕命重口腹爾來廿
里間杯羹數家哭譬諸安與史敢用甘顛覆溺愛多不
明奚止一水族作此河鮑詩逢人敢忠告

過鄒道卿先生墓有感

忠公天下士夙學能慎獨平生寸心赤耿耿照黃屋元

符引裾諫痛甚賈生哭上言正中宮下言斥當軸直道
時不容除名竄荒服建中及崇寧寵辱手翻覆炎蒸嶺
南地文章散清馥晚歲歸故山林莊竟埋玉向來望佳
城鬱鬱暗松竹今為禾黍區春雨耕陂陂翁仲知何歸
雲仍困無告嗟予佔畢生斯文賴私淑願言理侵疆重
植宰上木愚公將移山自謂計已熟精衛欲填海可奈
力不足傷心復傷心殘碑卧荒麓

簡吳門葛可久

東南古吳會江湖浸坤軸閭門萬人海驪珠混魚目嗟
爾珊瑚枝光彩照壑谷挺挺八尺軀便便五經腹復用
岐黃書教子時共讀座有焦尾桐樽餘荔枝綠我室雖
甚遠扁舟往來熟此別獨經年羹牆見鴻鵠珍重應時
須抵鵲毋以玉

時分省募文武士間可
久欲應命故有末句

寄謝京口俞府判先生辨惑編序

憶昨倚檣梧往學太古音清風一揮手為我湔蓬心言
歸卧空谷神飛繞惟林寄來明月珠價重雙南金豈不

懷報章慙媿秋蟲吟人生少會遇歲月何駸尋晨瞻祿
山高夕覽江水深江山渺予懷塵世盈我襟行當駕黃
鶴從遊閬山岑

瑤花行送盛克明歸維揚

揚州好花非不多奈爾絕品無雙何水沉香骨素玉蕊
琉璃滑葉青搖柯東風二月花時節二十四橋香浸月
小山叢桂避芳塵東閣官梅褪殘雪向來名士多品題
括香御史今亦知何日移春獻天子不負此花天下奇

王長史代祀天妃回偶留常州為予作辨惑編
序驛亭飲別以詩謝之

使者祈靈海上回蛟螭遠避漕舡開
入朝將進賢人頌當路皆知館閣材
傾蓋道邊欣邂逅車林下久徘徊
彩毫題我蒲編去鸞鳳回翔燕雀猜

長史名餘字叔善
平章庫庫館客也

奉同干尚書賀高太尉承恩詩

紫鳳啣書下日邊一樽金幣禮高年
天恩已見來三錫月俸猶供十萬錢
綠野午橋閑几杖長洲茂苑美山川

舊家池館花如錦
簫鼓春風送酒船

次韻陳心遠久雨

秋風卷衡茆我屋漏已久
春來復多雨水馬階下走人
皆憂巨浸我謂晴可守
獨憂東海上連年聚羣醜
官軍涉鯨波鼠輩未梟首
西疇化沮如閑我扶犁手
何以解此憂山鉅瀉春酒

喜復鄒忠公墓田賦絕句十首謝兩郡侯

新松重植古人墳
五馬同來兩使君
歸我侵疆三十畝

山靈慚愧謝移文

二

白頭翁媪倚林莊
咲指荒邱舊石羊
誰料百年荆棘裡
又看金紫奠椒漿

三

奕奕祠亭春雨晴
青山紅塔照簷楹
檐前燕雀聲何喜
冠蓋如雲為落成

四

去年風雨暗桑麻
今雨楸梧一望賒
寄語無情梟獍子
隴頭銜土有慈鴉

五

傾囊不惜購殘碑
為愛前朝幼婦詞
賴有賢侯知古意
從教俗士笑書癡

六

府公遺愛沾幽壤
禮部文章勒翠珉
寒食清明人洒飯
落花飛絮鳥啼春

七

里翁猶記前朝事五馬年年上冢來
白鳥能言高柱立黃楊合抱細花開

八

青山無數麒麟冢人到林莊下馬過
為問路傍楊柳樹向來興廢事如何

九

景鄒亭在稼亭東斷礎猶存草莽中
郡圃何時重構築

羹牆長見道鄉翁

十

千古一坯忠義土青山門戶碧溪陰
溪流冷浸中宵月照見先生未死心

二月歸田舍作

十年為客不窺園數日還家獨閉門
兒女牽衣拂塵土親朋折簡問寒暄
江南花柳青春好淮上風烟白晝昏
聞道賊渠今磔死雨窓歡喜倒芳樽

二

余生甘分老漁樵竹徑柴扉掩寂寥舍後薄田堪種秫
門前流水喜通潮人遭歲歉殮榆粥天假春晴養麥苗
早起凭高望西北楚氛猶似未全消

三

天開鐵網放鯨鯢甲馬歸營罷鼓輦四海蒼生皆鼓舞
三苗何物竟昏迷愁聞近日軍需急幸得新年米價低
春雨隴頭耕未得桑林布穀為誰啼

四

鴉鳴鵲噪總無靈庸孺謠言更莫聽萬國山河春蕩蕩
一時烟霧晝冥冥官軍自足追窮寇縣吏猶勞募壯丁
何日賣刀仍買犢花村雞犬共安寧

五

飛芻輓粟未能休嗟我鄉隣日夜憂何事羣兇恣猖獗
半年諸將擁貔貅桃花過雨紅顏老杜宇傷春血淚流
堪笑腐儒無可用下帷依舊說春秋

記夢

并序

至正十二年六月初八日夜夢于先人舊居之後
堂看故兄所遺春帖有讀書傳家等語因念先人
嘗言曾大父以儒名家從父領鄉薦為校官我兄
猶好學而文今其孫無有似者次兄二子皆廢學
吾三子皆未成立以此感泣既覺而涕泗交頤心
甚怵惕因作以示兒

苦熱夜難寐坐久方偃息夢歸巷南宅竹樹皆歷歷伯

兄手題詩猶存後堂壁余時因感傷先世本縫掖書聲
今寂寥寶樹化荊棘立觀楷書字哭泣泪沾臆覺來憶
詩話白月光滿室重念世澤微門衰自疇昔我方垂髫
時伯父死于溺音容兩茫然了若不相識但聞能孝友
風姿頗清逸四十五六年遺文總狼籍題壁尚何有此
夢生此夕予生雖無成多賴讀書力楷劇鏡上塵積累
機上帛嗣續幸不泯所願能自植木也年十六林亦及
二七阿森今九齡父母俱愛惜不為樵牧童又不學稼

檣螢窓與雪案寸晷宜自惜讀書承世業此語真藥石
汝曹能黽勉是亦尊汝伯旁觀勿相笑說夢等兒劇

客來

革孔頻移轉覺寬酒杯雖舉不成懽客來為說紅巾苦
窓下榴花亦怕看

進士馬仲達為常州路錄事司達魯花赤監築
城以詩見示余次韻荅

風櫺抱膝聽鳴蜩頗覺鄉隣有呌齟四海百年歸一統

兩階何日格三苗斗城新築關門早鐵騎南征去路遙
年少參軍金榜客可無奇策上丹霄

至正壬辰十月廿二日于妻兄任氏家避亂得
家兄信感歎而作

避地橫山下離家十日餘鵠原常在望魚素忽傳書猛
虎走城郭蝮蛇生里閭欲歸歸未得搔首獨躊躇

初度有感

十一月初六日時
年五十寓任氏

我生何不辰垂白遭亂離鄉城箭滿眼咫尺不得歸百

年今已半喘息能幾時桑蓬負初心夢我有餘悲慚愧
朱買臣富貴能自期男兒無所成百齡亦何為對酒不
復飲把劍空歎歎

寇退別詹魯賢

君家天台下我家潞河邊針芥一相投膠漆四五年倉
皇避羣盜妻子同一船中途苦離散經旬各憂煎再見
若再生相依益相憐橫山樹歷歷東洲水濺濺山水非
不佳旌旗日紛然兩家妻與子一月夜不眠明發竄榛

棘衣被裹橐餽莫歸客欄下耳語青燈前葵心傾太陽
杞國憂崩天逝將哭秦庭乞師掃風烟臨期賊遁去此
志徒鬱然坐閱明年春東風草芊芊慘別斗城下相顧
猶夔蛇重結死生交永矢金石堅

送京口劉千戶歸營

桓桓千夫長胸有萬甲兵生長太平世終日醉六經一
朝著兜鍪躍馬出甕城擒賊不知數報國丹心傾台司
方論功憲節偕按行部曲嚴武威瘡痍撫罷氓寶刀洗

荆溪鐵馬歸柳營鶯花已春暮草樹猶血腥一雨殊足
喜四野布穀鳴吳兒賣刀劍買牛事春耕顧瞻天地間
埃氛未全清何當盡掃除丈夫功業成

過金陵明道書院訪友人高孟立山長適遇秩
滿且有側室洗兒之喜作詩賀之

客來鳳臺下適見生鳳雛斑斑五色羽拳拳百尺梧衆
客席上珍愛君掌中珠度曲紫玉簫瀉酒黃金壺起舞
為君壽試啼呼阿奴梅花亦解事含笑文庭隅

題陳時舉宅畫壁

雙松歲寒姿拳石太古色我昔山中遊憩此松下石松
花雪霏霏松葉風瑟瑟安知此清景相對復今日拏空
兩髯龍乃在一書屋主人罷鳴琴宴坐室生白客來苦
炎熱傍樹欲推幘不聞天籟鳴但見空翠滴煩衿頓如
洗林壑幽興適經月數相過明朝有行役黃埃赤日中
令人轉相憶

孫伯昭與陳天倪用簡齋一涼恩到骨四壁事

多違為韻賦詩見寄全和答之

薄田西河上種穀多種秫秋來喜甘雨牀頭釀真一我
思山中人不見如參商蒲萄好留客毋用博西涼秋水
漲百川無人洗乾坤堪笑閭閻下空懷報主恩東竺可
談書西竺堪寄傲山中儘寬閑俗客自不到淒淒草上
霜耿耿天上月遥憐兩淮地千里照白骨吾生西復東
徒以口腹累懷哉安樂翁不出時有四明月足可喜好
句無用覓寒蛩為誰悲唧唧鳴四壁殷勤語兒曹要識

一丁字明年世清寧依然重文事主人錦璫輸飲客金
叵羅遙憐古岩桂香似廣寒多持身服苦澹適口忘甘
肥青雲丈夫志白首慎無違

哀陶堯佐

并序

至正壬辰冬紅巾陷常州驅民攻京口不從者殺
之我邑人陶君堯佐不幸為賊所得且欲併驅其
諸父昆弟以行君厚賂之以一身脫眾人之急從
至丹陽聞官軍鼓譟聲即倒戈刺賊渠墮馬因被

害時吾里有識君者既而語其事于予予以君嘗
讀書知逆順故誠信而悲之閱二年方欲問諸水
濱筆之野史以暴白其難明之心其族人有為之
後者葬君衣冠予述前所聞作詩哀之

嗟爾練湖水不洗斯人污冤血化為碧春雨生苔蕪皇
天有老眼斯人實何辜生當太平日三世家業儒本無
縛雞力苦被豺虎驅孰知能賈勇倒戈誅賊渠鐵石一
寸心齏粉七尺軀而家既能全而憤亦已舒但恨薰與

猶混然骨同枯華表鶴不返竹林啼鳳雛衣冠藏古邱
魂魄遊清都擊賊作厲鬼當與張君徒天高不可問愁
雲晝模糊

兵後到杭馬掾史置酒見招且示以所與石處
道邱長卿西湖倡和之什次韻一首

西湖山色冷如灰前度劉郎今又來紅粉畫船今寂寞
斷橋流水自縈迴一堤寒柳風烟老兩鬢飛蓬歲月催
賴有故人能慰藉綠尊重對晚山開

西湖曲

西湖春水綠于酒西湖女兒嬌似柳依稀二月三月春
攀折千人萬人手我有一索青銅錢明朝也買下湖船
試歌斷辭孤兒曲湖上豈無人會傳

自錢唐回舟中懷馬掾史

省前山色翠欲滴幕下官曹清且閑公退每傾鸚鵡盃
客來頻熬鷓鴣斑坐看急雨沾花席應念扁舟出柳灣
白髮鄭虔羶未暖還家方苦路間關

舟中懷辛至善

春草綠如許之人猶未歸江東雲度水馬上雨沾衣王
事馳驅久家鄉信息稀多情舊時燕還繞畫梁飛

望官軍

揚子江邊羣盜來奔牛呂城飛劫灰客懷每日鬱不樂
笑口幾時能復開東郭流離人似蟻西村格鬪鼓如雷
官軍望斷無消息獨立斜陽首重回

示長子木

崔澤聚羣盜池魚恐遭殃喜今避地去溪上一葦杭汝
妻扶汝母小婢携橐囊卯角汝兩弟隨行色倉皇僕夫
偕汝留家居謹周防屋後林有竹林後園有桑祖宗百
年墳高樹蔭斧堂汝為吾家嗣承家奉烝嘗興廢固有
時生理無怠荒但無溝壑憂可待時世康鄉隣或侵陵
勿與較短長韓信跨下辱自度勢莫當婁公面上吐不
拭庸何傷彼惡汝勿為口亦勿播揚天定能勝人善惡
報乃彰松栢耐歲寒葵藿傾太陽此身可糞粉此志勿

改常汝幼頗醇謹亦嘗聞義方稍暇仍讀書慎勿弄杯觴行看太平日斯文復輝光

嚴將軍戰馬歌

并序

至正乙未春常多盜省府調兵捕之浙東宣慰司
元帥嚴公來總軍事未幾無錫平移軍武進一日
搗來富莊賊巢軍中失二馬明日賊乘之抗官兵
烈塘上二馬聞金鼓來奔賊控勒不能止遂墮地
馬立踴殺之官兵大捷故今烈塘之民咸神其事

俾予作歌以美之

往聞齊軍夜路迷老馬前導人追隨又聞的盧躍檀谿
漢業復立西南隅古來良驥稱有德未有驍騰能殺賊
將軍兩馬馱賊來雲霧四起生風雷紅綃帕首爾何物
霜蹄一路成飛灰軍前認主鳴且舞驚倒熊羆與羆虎
羣兇胆落不敢追官軍凱還槌大鼓馬兮馬兮誠有功
須知感物由老戎將軍接迹武惠功煌煌史冊書勲庸
爾馬名亦垂無窮

別姻家尹居士并序

尹氏世居金壇尹干橋其孫可傳者予女妻之故
避亂挈家依焉未幾寇兵自溧陽至予遂寄留家
具及古今書八百餘帙復回故邑矣

烽火西來滿眼紅歸帆忙挂鶴溪風蛟龍劍伏鄴城下
科斗書藏魯壁中邠老自憐能世守阮生誰信又途窮
一盃此夕誠何夕兒女挑燈笑語同

贈花御史常侍文尹晉陵

冰雪襟懷鐵面威，井鄉重過思依依。
州官跼蹐迎驄馬，父老懽欣識綵衣。
閩越地偏滄海接，江淮屋遠縞霜飛。
舊遊還念城東客，白首持竿坐釣磯。

過無錫口號

至正十五年十二月初一日丞相達識帖木爾公
赴江浙余因感憤而作

丞相樓船槌大鼓，鐵騎前驅猛于虎。
紛紛鼠輩敢橫行，與我官軍戰河許。
落日未落縣林梢，一天殺氣風騷騷。

官軍縱火鼠入窟太湖水濶陽山高相君賢似唐裴度
豈無將軍如李愬兜鍪載雪搗賊巢一夕湖船竟飛渡
我有一寸鐵願作將軍箭將軍三箭定陽山湖水依然
淨如練

楊鐵崖先生既為應芳敘思賢錄又以應芳上
書丞相府不報作長詩贈行是用感激賦此留
別兼謝

錢塘江上久為客光範門前三上書喜得問奇揚子宅


何慙題柱馬卿車風塵鴻洞人皆恐冰雪崢嶸歲又除
覓得驪珠三百顆橫山歸卧舊田廬

代簡蘇景瞻先生

西門渡頭春水生故人不來舟自橫聞道移家近湖住
手栽桑柘綠陰成

二

布穀聲中春雨晴溪頭倚杖看春耕干戈滿地人相食
宜爾龐公不入城



龜巢稿卷二